

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 64. sjednici Predstavničkog doma, održanoj 24. novembra, 2. i 7. decembra 2009. godine, i na 39. sjednici Doma naroda, održanoj 15. decembra 2009. godine, usvojila je

ZAKON

O IZMJENAMA I DOPUNAMA ZAKONA O UPRAVI

Član 1.

U Zakonu o upravi ("Službeni glasnik BiH", broj 32/02) u članu 2. st. 1. i 2. mijenjaju se i glase:

"Poslove uprave iz nadležnosti Bosne i Hercegovine (u daljnjem tekstu: BiH) obavljaju ministarstva i upravne organizacije kao samostalne upravne organizacije, upravne organizacije u sastavu ministarstava (u daljnjem tekstu: organi uprave), kao i druge institucije Bosne i Hercegovine osnovane posebnim zakonom ili kojima je posebnim zakonom povjereno obavljanje poslova uprave.

Određene poslove uprave mogu obavljati preduzeća, ustanove i druga pravna lica, kad im je zakonom povjereno vršenje javnih ovlaštenja (u daljnjem tekstu: institucije s javnim ovlaštenjima)."

Član 2.

U članu 10. tačka 1) mijenja se i glasi:

"1) vode politike razvoja i izvršavaju zakone i druge propise;"

Član 3.

U Poglavlju II., naziv odjeljka 2. mijenja se i glasi:

"2. Provođenje politike razvoja i izvršavanje zakona i drugih propisa".

Član 4.

Član 11. mijenja se i glasi:

"Član 11.

Organi uprave u okviru svojih nadležnosti vode politiku razvoja koja obuhvata utvrđivanje razvojnih strategija i podsticanje privrednog, socijalnog, kulturnog, sportskog, ekološkog i ukupnog društvenog razvoja.

Organi uprave izvršavaju zakone i druge propise neposredno njihovom primjenom, rješavanjem upravnih stvari u upravnom postupku, donošenjem i izvršavanjem rješenja i drugih pojedinačnih akata, preduzimanjem upravnih mjera i upravnih radnji, praćenjem njihovog izvršavanja, davanjem obavještenja, izdavanjem stručnih uputstava i instrukcija za rad, pružanjem stručne pomoći, obavljanjem upravnog nadzora i obavljanjem drugih upravnih poslova iz oblasti svoje nadležnosti."

Član 5.

Iza člana 13. dodaje se novi član 13a. koji glasi:

"Član 13a.

Nadzor nad zakonitošću rada institucija koje imaju javna ovlaštenja organi uprave provode rješavanjem u postupku po žalbama, kao i kontrolom ostvarivanja prava i obaveza koji su u skladu sa zakonom preneseni na institucije koje imaju javna ovlaštenja."

Član 6.

Član 14. mijenja se i glasi:

"Član 14.

Organi uprave u obavljanju inspekcijskog nadzora iz okvira svoje nadležnosti ostvaruju neposredan uvid u zakonitost rada, poslovanja i postupanja organa uprave, preduzeća, ustanova i drugih pravnih i fizičkih lica u vezi s provođenjem zakona i drugih propisa, te preduzimaju upravne i druge mjere za koje su ovlašteni zakonom, radi usklađivanja utvrđenog stanja s propisom."

Član 7.

U Poglavlju II., naziv odjeljka 4. mijenja se i glasi:

"4. Donošenje provedbenih propisa".

Član 8.

Član 16. mijenja se i glasi:

"Član 16.

Rukovodioci organa uprave donose propise s ciljem omogućavanja izvršavanja zakona i drugih propisa iz nadležnosti organa uprave kojim rukovode, kada su za to zakonom ovlašteni."

Član 9.

U članu 18. stav 1. mijenja se i glasi:

"Organi uprave u pripremi nacрта i prijedloga zakona i prijedloga drugih propisa iz svoje nadležnosti dužni su pribaviti mišljenja nadležnih organa uprave, stalnih tijela Vijeća ministara i stručnih institucija i provesti postupak javnih konsultacija, ako je to značajno za definiranje određenih pitanja."

Član 10.

U članu 20. u stavu 1. iza riječi "naročito" dodaju se riječi: "provođenje politike razvoja i".

Član 11.

U članu 22. stav 1. mijenja se i glasi:

"Institucijama s javnim ovlaštenjima može se zakonom povjeriti obavljanje određenih upravnih i stručnih poslova iz nadležnosti organa uprave. U okviru povjerene nadležnosti institucije s javnim ovlaštenjima odlučuju u pojedinačnim stvarima o određenim pravima i obavezama građana, preduzeća, ustanova i drugih pravnih lica."

Član 12.

U članu 23. riječi: "čl. 4., 7. i 8. ovog zakona" zamjenjuju se riječima: "čl. 4., 5., 6., 7. i 8. ovog zakona".

Član 13.

U nazivu poglavlja IV. iza riječi: "PARALMENTARNOJ SKUPŠTINI," dodaju se riječi: "PREDSJEDNIŠTVU I".

Član 14.

U članu 27. u stavu 3. iza riječi: "zakona i drugih propisa" dodaju se riječi: "i o provođenju politike razvoja".

Član 15.

U Poglavlju IV., naziv odjeljka 2. mijenja se i glasi:

"2. Odnos organa uprave prema Predsjedništvu i Vijeću ministara".

Član 16.

Član 28. mijenja se glasi:

"Član 28.

S ciljem osiguranja izvršavanja zakona i drugih propisa Parlamentarna skupština, Predsjedništvo i Vijeće ministara, u okviru svojih nadležnosti, mogu prema organima uprave:

utvrditi uputstva i smjernice o načinu izvršavanja zakona i drugih propisa, naložiti da u određenom roku donesu propise ili preduzmu mjere za koje su ovlašteni i utvrde rokove za izvršavanje pojedinih zadataka, naložiti organima uprave da ispituju stanje u oblastima iz svoje nadležnosti i da podnesu Predsjedništvu i Vijeću ministara izvještaj s odgovarajućim prijedlozima."

Član 17.

Član 29. mijenja se i glasi:

"Član 29.

Radi ostvarivanja odgovornosti organa uprave prema Predsjedništvu i Vijeću ministara, Predsjedništvo i Vijeće ministara mogu, u okviru svojih nadležnosti, otvoriti raspravu o radu i odgovornosti organa uprave i utvrditi način ispitivanja stanja u oblasti iz njihove

nadležnosti i pokrenuti postupak za smjenjivanje rukovodioca i zamjenika rukovodioca organa uprave."

Član 18.

Član 30. mijenja se i glasi:

"Član 30.

Organi uprave Predsjedništvu i Vijeću ministara u okviru njihove nadležnosti obavezni su dostavljati izvještaje o radu kao i o stanju u oblastima za koje su nadležni, te informacije, objašnjenja, podatke, spise i drugu dokumentaciju potrebnu za rad Predsjedništva i Vijeća ministara.

Organi uprave mogu od Predsjedništva i Vijeća ministara u okviru njihove nadležnosti tražiti uputstva i smjernice o određenim pitanjima izvršavanja zakona i drugih propisa. Predsjedništvo i Vijeće ministara u okviru nadležnosti obavezni su odgovarati na traženje organa uprave.

Organi uprave mogu Predsjedništvu i Vijeću ministara u okviru njihove nadležnosti predlagati razmatranje određenih pitanja za koja su nadležni i davati prijedloge za preduzimanje potrebnih mjera."

Član 19.

Iza člana 31. dodaje se novi član 31a., koji glasi:

"Član 31a.

Organi uprave nadležni za poslove inspekcijskog nadzora, osim saradnje iz člana 31. ovog zakona, u provođenju inspekcijskog nadzora sarađuju s nadležnim sudovima, tužilaštvima, organima uprave i drugim organima."

Član 20.

Naziv poglavlja V. mijenja se i glasi:

"POGLAVLJE V. ODNOSI ORGANA UPRAVE PREMA PREDUZEĆIMA, USTANOVAMA I DRUGIM PRAVNIM LICIMA I STRANKAMA".

Naziv odjeljka 1. poglavlja V. mijenja se i glasi:

"1. Odnosi organa uprave prema preduzećima, ustanovama i drugim pravnim licima".

Član 21.

Član 37. mijenja se i glasi:

"Član 37.

Organi uprave u okviru svojih nadležnosti imaju prema preduzećima, ustanovama i drugim pravnim licima ovlaštenja i obaveze predviđene zakonom."

Član 22.

U članu 38. st. 1. i 2. mijenjaju se i glase:

"Organi uprave sarađuju s preduzećima, ustanovama i drugim pravnim licima koja su od značaja za rad organa uprave ili su od interesa za rad navedenih organa.

Preduzeća, ustanove i druga pravna lica obavezna su na zahtjev organa uprave dostavljati podatke i informacije iz svoje nadležnosti."

Član 23.

U članu 47. st. 1. i 2. mijenjaju se i glase:

"Organi uprave osnivaju se i njihova nadležnost utvrđuje se zakonom koji donosi Parlamentarna skupština, na prijedlog Vijeća ministara.

Organi uprave iz stava 1. ovog člana osnivaju se na način koji osigurava potpuno i racionalno obavljanje poslova uprave iz okvira nadležnosti institucija Bosne i Hercegovine, odnosno efikasno ostvarivanje prava i izvršavanje obaveza građana, preduzeća, ustanova i drugih pravnih lica."

Član 24.

U članu 49. iza stava 1. dodaje se novi stav 2. koji glasi:

"Organi iz stava 1. ovog člana, radi obavljanja stručnih, tehničkih i drugih poslova, mogu osnivati i druga tijela kao i tijela za saradnju s međunarodnim organizacijama u skladu s obavezama preuzetim međunarodnim ugovorima."

Dosadašnji st. 2. i 3. postaju st. 3. i 4.

U dosadašnjem stavu 3. koji postaje stav 4. iza riječi "člana" na kraju rečenice dodaju se riječi: "kojom se može, ako to priroda posla zahtijeva, odrediti da služba ima svojstvo pravnog lica."

Član 25.

U članu 50. stav 2. mijenja se i glasi:

"Upravne organizacije osnivaju se u obliku uprava, agencija, zavoda, direkcija, instituta, centara ili ureda."

Član 26.

U članu 51. dodaje se novi stav 1. koji glasi:

"Uprava se osniva za obavljanje upravnih, stručnih i drugih poslova iz svoje nadležnosti i to kod pitanja koja zahtijevaju primjenu posebnih načina rada, a koje je neophodno obavljati u okviru organa uprave, odnosno za rješavanje u upravnim stvarima kad je za to izričito zakonom ovlaštena, za provođenje upravnih, odnosno inspekcijskih nadzora i za pripremanje nacрта zakona i prijedloga drugih propisa."

Dosadašnji st. 1., 2. i 3. postaju st. 2., 3. i 4.